



Jumat, 04 Noveber 2022
Ogen : Daniel 5:13-31



Erti Surat



Upah jadi sada perayaken bas geluh. Reh belinna upah semalna reh semangatna bas ndahiken dahin e. Tapi oratenta wari enda Daniel nulak upah sitawarken raja man bana. Raja mindo man Daniel gelah nuriken/mereken erti surat sierbahanca gulut ukurna. Alu erkemalangen man Dibata, Daniel pe nuriken kerna antusen surat e.

Kata si tersurat e eme : MENE, MENE, TEKEL, UPARSIN. Ertina e me kap: *bilangen*, enggo ibeligai Dibata wari-wari kinirajan raja, janah ipeltepkenna; *timbangan*, raja enggo itimbang i bas timbangan, janah teridah maka raja e menahangsa; *pembagin*, kerajan raja ibagi-bagikan man kalak Medi ras Persia. Enda me erti kerna tulisen sierbahanca gulut ukur dengen sambar ayona sedekah enda.

Kenca enggo tangkas antusen surat enda maka raja minter nuruh juak-juakna ngusi Daniel salu jubah si meherga dengen mehaga, iburakenna rante emas bas kerahungna dengen iangkat me Daniel jadi kalak sipeteluken bas kerajan e. Erti surat e mpesalang ukur serbut, aminna pe ertina labo nuriken kerna kinihagan entah pe pujin man raja. E maka iberekenna simehulina pe man Daniel jadi upahna.

Teridah tuhu kinikuasan Dibata e ganjangan asangken kerina si lit bas doni enda. Dibata ngasup nuriken si la iantusi kalak entah dibata-dibata sideban. Kuncina; Daniel tetap erpengendes dengen fokus man Dibata e maka ipetangkas Dibata me kerina si terbuni. IbabaiNa kita ngantusi si la terantusi doni enda. Banci jadi lit sada perbeben jadi bas geluhta, labo perlu sisungkun guru sibaso entah peramal tapi sungkunlah Dibata sabap IA simeteh kerinana.

